

ՀԱՅԱՍՏԱՆԻ ՔԱՂԱՔԱԿԱՆ ՎԻՃԱԿԸ ԱՐՏԱՎԱԶԴ V-Ի
ԺԱՄԱՆԱԿ (252/3—261)

Ս. Տ. ԵՐԵՄՅԱՆ

ՀՍՍՀ ԳԱ ակադեմիկոս

III—IV դդ. Սասանյան իրանի պետության՝ Երանշահրի պատմությունը բնորոշվում է այն ծանր ու համառ պայքարով, որ նա մղում էր Հռոմեական կայսրության դեմ իր արևմտյան սահմանագծում գտնվող Միջագետքին տիրելու համար։ Այդ անընդմեջ ռազմական բախումներին անխուսափելիորեն պիտի ներգրավվեր նաև Հայաստանը, և հայ ժողովուրդը ճիգեր էր թափում իր անկախությունը պահպանելու համար։ Երկու մարտնչող աշխարհակալությունների պայքարի արդյունք էր Մեծ Հայքի թագավորության տարածքի բաժանումը նրանց միջև։ Դա հետևանք էր 244 թ. կնքված «ամենաամոթաբեր հաշտության», որը Հռոմի կողմից ճանաչվեց միայն 252/3 թ.¹։ Ըստ այդ համաձայնագրի, Մեծ Հայքի թագավորության տարածքի 4/5-ը անցավ Իրանին, իբրև նրան ենթակա վասալ թագավորություն, տեղական դինաստիայի՝ Արշակունի գահակալի գլխավորությամբ, իսկ 1/5-ը մնաց նախկին վիճակում, այսինքն՝ իբրև Հռոմեական կայսրության վասալ թագավորություն, որտեղ իշխում էր Տրդատ II Արշակունի թագավորը։

Հայաստանի պարսկական մասը մտավ Երանշահրի կոնֆեդերացիայի մեջ և անցավ քաղաքական գոյության այն փուլերը, որ բնորոշ էին Սասանյան իրանին ենթակա կախյալ թագավորություններին։ Սակայն Երանշահրի կոնֆեդերացիայի կազմում գտնվող Հայաստանը միայն 9 տարի կառավարվեց տեղական դինաստիայի ներկայացուցչի կողմից, հանձինս Արտավազդ V Արշունի թագավորի (252/3—261)։ Նա պետք է գահընկեց արված ու սպանված լինի, և Հայաստանի այս մասը դառնում է Սասանյան արքայազունների «դաստակերտ»։

252/3 թ. Շապուհ I-ը (243—272) հարկադրեց Գալլոս կայսրին (251—253) պաշտոնապես ճանաչել 244 թ. «ամենաամոթաբեր հաշտությունը», սակայն հռոմեացիների կողմից լքված Հայաստանը ապստամբած Տրդատ II-ի (216—252/3)² գլխավորությամբ դեռ մաքառում էր անկախության համար։ Ստեղծվել էր այնպիսի վիճակ, որ երկիրը գրեթե ամբողջովին գրավել էին պարսիկները, իսկ Տրդատի որդիների և Արշակունի ազգականների մի մասն արդեն անցել էր հաղթողների կողմը և դրանով գեթ ժամանակավորապես փրկել հայ Արշակունիների գահակալական իրավունքները։ Ինչպես հաղորդում է Զոնարան (12, 21), երբ պարսիկները նվաճեցին Հայաստանը, «այս երկրի Տրդատ թագավորը փախավ, իսկ նրա որդիները մեկնեցին պարսից

1 Ս. Տ. Երեմյան, «Ամենաամոթաբեր հաշտությունը»։ Մեծ Հայքի թագավորության բաժանումը 244—252/3 թթ. Սասանյան իրանի և Հռոմեական կայսրության միջև (տպագրվում է)։

2 Այնուհետև Տրդատ II-ը թագավորել է Հայաստանի հռոմեական մասում՝ 252/3—273 թթ.։

կողմերը³, ինչպես ժամանակին Պարթև Արշակունիների արքայատոհմի ներկայացուցիչները՝ Վանազանդեցան և ի ծառայութիւն մտին համբարձելոյ քաղաքութեան Ստահրացոյն և, ընդ նմին միամտեցան⁴։ Շատ ավելի ուշ, սակայն, ճանաչեցին կախվածութիւնը նրանցից նաև հայ Արշակունիները։

Հավանաբար, քաղաքական կողմնորոշման հարցը մեծ տարածություններ էր առաջ բերել հայկական արքունիքում։ Տրդատ II-ի որդիների մի մասը մերժել էր հոր հռոմեասեր քաղաքականությունը և մնացել էր Հայաստանի պարսկական հատվածում, իսկ մյուսները՝ նախարարների ղեկավարմամբ մասի և Տրդատ II-ի հետ անցել էին Մեծ Հայքի հռոմեական մասը։ Նախարարներից մի քանիսն էլ ապստամբել էին անմատչելի լեռներին ու ամրություններին։ Ինչպես հպատակ այլ երկրներում, այնպես էլ Հայաստանում, Սասանյանները ժամանակավորապես հանդուրժեցին տեղական թագավորի իշխանությունը, որը, անշուշտ, Արշակունի դինաստիայից էր և տարագիր Տրդատ II-ի ազգականներից՝ Արշակունի սեպուհներից մեկը։ Այդ Արտավազդն էր, որ Շապուհ I-ի կողմից բարձրացվեց հայկական գահը, իրավական այն հիմքերի վրա, որ գոյություն ունեւ պարթևների և հայերի միջև 63 թ. Հռոմեական պայմանագրի համաձայն, ըստ որի՝ հայկական գահը համարվում է պարթև Արշակունիների «երկրորդական դահը»։ Այժմ, չնայած դինաստիան փոխվել էր, սակայն մնում էր Իրանի պետությունը և «որ Հայոց թագաւոր էր՝ նա էր երկրորդ Պարսից տէրութեանն»⁵։

Արտավազդ V-ը Մեծ Հայքի պարսկական մասում, Վաղարշապատ մայրաքաղաքում թագավորել է շուրջ 9 տարի՝ 252/3—261 թթ.։ Գերիշխող է այն կարծիքը, որ այս Արտավազդ V-ը Արշակունյաց դինաստիայից չի եղել և թերևս նա նույն Արտավազդ Մանդակունին է, որ ճիշտ չպետք է լինի⁶։ Անշուշտ, ավելի հիմնավորված է Ա. Անինսկու ենթադրությունը, որ Արտավազդ V-ը Տրդատ II-ի որդին է⁷։ Նա կարող է նրա որդին չլինել, բայց իր Արշակունի ազգականներից է։ Ա. Կադ. Հ. Մանանդյանը հիմնավորված և հաստատուն չհամարելով գիտնականների կռահումներից և ոչ մեկը, գրում է. «Վարելի է միայն հավանական համարել, որ այս Արտավազդ թագավորը, որը Սասանյան Պարսկաստանի կողմնակից էր և բարեկամ, հայ Արշակունիների տոհմիցը չէր»⁸։ Երբ կշռադատում ենք այն ժամանակի պատմական իրադրությունը, տեսնում ենք, որ այս կարծիքը չի կարող ճիշտ լինել։

³ Հ. Մանանդյան, Քննական տեսություն հայ ժողովրդի պատմության, հ. Բ, մասն. Ա, Երևան, 1957, էջ 84—85։ Ինչպես ճիշտ նշում է Մ. Աբեղյանը, «Հռոմեական կողմը փախչող Տրդատ Բ-ն է մեծ հասակում. վեսլի մեջ նա փախչելիս հիշվում է իրրև մանկիկ ըստ վիպական ոգու» (Մանուկ Արևելյան, Երկեր, հ. III, Երևան, 1968, էջ 188)։

⁴ «Ազաթանգեղայ Պատմութիւն հայոց», Տփղիս, 1909, էջ 17։

⁵ Նույն տեղում, էջ 15։

⁶ Մենք ևս բաժանում էինք այդ կարծիքը, սակայն նոր նյութերի հետազոտությունը բերեց հակառակ եզրակացության (տե՛ս Ս. Տ. Երեմյան, Նախ-ի Ռուստեմի «Փառա-ի Զարդուշտ» հուշարձանի արձանագրության վկայությունները Հայաստանի մասին («Պատմա-բանասիրական հանդես», 1966, № 2, էջ 62—63)։

⁷ А. Аннинский, Древние армянские историки как исторические источники. - Одесса, 1899, стр. 44.

⁸ Հ. Մանանդյան, նշվ. աշխ., էջ 93։

Եթե աչքի առաջ ունենանք Սասանյանների ընդհանուր քաղաքականությունը, Երանշահի կազմում մտնող ոչ-իրանական («Ան-Երան»)՝ երկրների թագավորությունների նկատմամբ, կտեսնենք, որ նրանք հանդուրժում էին Սասանյանների ժառանգության մեջ մտած տեղական պարթևական ավագանու ներկայացուցիչներին, նույնիսկ պարթև Արշակունիների շառավիղներին։ Սակայն դա ժամանակավոր երևույթ էր, և հարմար առիթի դեպքում տեղական դինաստիայի թագավորությունը վերացվում էր ու տվյալ երկրի գահը դառնում էր Սասանյան դինաստիայի ներկայացուցիչների ժառանգական սեփականություն՝ «դաստակերտ»։ այդպես էին՝ Մեշան (Մեսենե), Գեղան, Կրման և «Հինդ», Սադաստանի, Տուրեստանի, մինչև ծովափ» միացյալ երկրների գահը, ապա Հայաստանը, ավելի ուշ՝ Քուշանաց աշխարհը (Քուշանշահրը)։ Նշված երկրներից Սասանյանների համար ամենակարևորը հռոմեական կայսրությանը սահմանակից Հայաստանն էր։ Հայաստանին տիրելու համար Հռոմի և Պարթևստանի միջև մղվող պայքարը պարթև Արշակունիների վերացումից և Սասանյանների տիրակալության հաստատումից հետո ավելի է սրվում։ Տիգրանի արքունիքի հիմնական ձգտումն էր Հայաստանում հաստատել Սասանյան դինաստիայի ժառանգական իշխանությունը, այնպես, ինչպես առաջ Մեծ Հայքը Արշակունիների երկրորդ թագավորությունն էր հանդիսանում և հայկական գահը՝ «երկրորդական գահ»։ Այժմ նույն ստատուսը պիտի ստանար Հայաստանը, իբրև Սասանյանների երկրորդ թագավորություն, իսկ հայկական գահը՝ Սասանյանների «երկրորդական գահ»։ Ինչպես կտեսնենք, դա նրանց հաջողվում է ժամանակավորապես իրագործել։

Սասանյանների այս քաղաքականության պայմաններում, ժամանակավորապես (ընդամենը 9 տարի) հանդուրժվում է հայ Արշակունի՝ սեպուհ Արտավազդի թագավորությունը։ Դա Սասանյանների համար միջոց էր երկիրն իրենց կողմից գրավելու, և պատեհ առիթը ներկայանալուն պես Արտավազդը պիտի գահընկեց արվեր և հայկական գահը պետք է դառնար Սասանյան գահաժառանգների սեփականություն։

Մեղ հետաքրքրող Արտավազդ V թագավորի մասին կցկտուր տեղեկություններ են պահպանվել Մովսես խորենացու «Հայոց պատմության» մեջ, ուր որոշ պատճառներով այս Արտավազդը շփոթվել է Արտաշեսի որդի Արտավազդի հետ։ Խորենացու տեղեկությունների մեջ պահպանվել են աղոտ փաստեր Տրդատ II-ի արքունիքում առաջացած տարածաշրջանների մասին, որոնք կապվում են Արտավազդ V-ի գահակալության հետ։ Մեղ հասած կցկտուր տեղեկությունների համաձայն, Տրդատ II-ի թագավորության ժամանակ գահաժառանգ էր նրա որդին՝ Խոսրովը, միայն որը իրավունք ուներ բնակվելու Այրարատում՝ հայոց ոստանում (հայկական արքունիքում), որն այդ ժամանակ գտնվում էր Վաղարշապատում։ Արշակունյաց տոհմի մյուս ներկայացուցիչները՝ ավագ սեպուհները, բնակվում էին նրանց հատկացված Հաշտյանք, Աղիովիտ և Առբերանի գավառներում։ Արտավազդը գահաժառանգ չէր ու թագավորել է իբրև Սասանյանների քաղաքականության կողմնակից

⁹ Շապուհ I-ի արձանագրություններում Հայաստանը հիշատակվում է «Ան-Երան» երկրների շարքում։ Տե՛ս В. Г. Луконин, Завоевания сасанидов на востоке и проблема кушанской абсолютной хронологии («Вестник древней истории», 1969, № 2, стр. 32, прим. 721), տե՛ս նաև Р. Чард Фрайд, Наследие Ирана, М., 1972, стр. 295.

և, անշուշտ, որպես հակառակորդ Հայաստանի հռոմեական մաս անցած իր հոր կամ եղբոր՝ Տրդատ II-ի ու նրա որդի՝ գահաժառանգ Խոսրովի:

Մովսես Խորենացին, այս ժամանակ տեղի ունեցած դեպքերը խառնելով Տրդատ I-ի (63—88) ժամանակի դեպքերի հետ, հաղորդում է, որ Տիրան (իմա՝ Տրդատ II) թագավորը, որը «մտերմութեամբ ծառայեաց հռոմայեցւոց»¹⁰, հարկադրված էր ղաղվել Հաշտյանք, Աղիովիտ և Առքերանի գավառներում բնակվող Արշակունի սեպուհների հարցով: Ըստ Խորենացու տեղեկության, Տիրան-Տրդատի մոտ են գալիս Արշակունյաց ցեղից իր հին ազգականները, որոնք ապրում էին Հաշտյանքի կողմերում և ասում. «Ընդարձակեա՛ մեզ զժառանգութիւնս, զի նեղ է. քանզի բազմացաք յոյժ»: Եւ նա հրամայէ ոմանց ի նոցանէ երթալ ի գաւառն Աղիովիտի և Առքերանույ: Իսկ սոցա առաւել ևս բողոք կալեալ առ արքայի, թէ առաւելագոյն նեղ է մեզ՝ ոչ ինչ ունկնդիր լինի Տիրան. այլ հաստատեալ վճիռ՝ ոչ այլ ժառանգութիւն տալ նոցա, բայց զոր ունէինն՝ հաւասար տրոհել յինքեանս»¹¹: Այնուհետև պատմահայրը ավելացնում է, որ հողը «բաժանեալ ըստ մարդաթուի՝ գտաւ պակաս ժառանգութիւն բնակողացն Հաշտենից. վասն որոյ բազումք ի նոցանէ եկին ի գաւառն Աղիովիտի և Առքերանույ»¹²: Այս ընդարձակ հատվածի մեջ նշված է Արշակունի սեպուհների դալը Հաշտյանք գավառից Աղիովիտ և Առքերանի գավառներ: Հայաստանում III դ. կեսերին ստեղծված՝ իրագրությունը նկատի ունենալու դեպքում կտեսնենք, որ այս տեղեկության մեջ ճիշտ չեն բացատրված Արշակունի սեպուհների գալու հիմնական շարժառիթները: Եթե հաշվի առնենք այն հանգամանքը, որ 244—252/3 թթ. բաժանումով Հաշտյանք գավառը մտնում էր Հայաստանի հռոմեական մասում, իսկ Վանա լճի հյուսիսային և հյուսիս-արևելյան եզրերում գտնվող Աղիովիտ և Առքերանի գավառներն ընկնում էին պարսկական Հայաստանի կենտրոնական մասում, ապա պարզ կլինի, որ Խորենացու վկայության մեջ արտացոլվել է այն իրողությունը, որ Տիրան-Տրդատ II-ի քաղաքականությունից դժգոհ Արշակունի սեպուհները նրան անցած երկրամասից փախչում են պարսկական մասը և ենթարկվում Սասանյանների գերիշխանությանը: Ահա այս Արշակունի սեպուհներից պետք է լինի Մեծ Հայքի պարսկական մասի գահակալ, «մեծ թագաւորն Հայոց» կամ «մեծ արքայ Հայոց» Արտավազդ V-ը:

Արտավազդ V-ի թագավորությունը, ինչպես արդեն ասվեց, Սասանյաններն առժամանակ հանդուրժում էին: Հայոց թագավորը, իբրև վասալ իր այրուձիով պարսկական զորամասերի հետ մասնակցում էր Հռոմեական կայսրության դեմ մղվող պատերազմներին, սակայն սա ժամանակավոր երևույթ էր, քանի որ վաղ թե ուշ Սասանյան իրանն իրեն անցած Մեծ Հայքի մեծագույն մասը պիտի դարձնէր Երանշահրի արքայից արքայի գահաժառանգի (որ միևնույն ժամանակ գերագույն զորահրամանատար էր) «գաստակերտը»: Կարևոր է նշել, որ Խորենացին Արտավազդ թագավորի անունը կապում է Անձևացիք գավառի և Անձևացյաց նախարարական տոհմի հետ, որի ներկայացուցիչը՝ Երախնավու Անձևացին, ըստ Խորենացու վկայության, եղել է արևելյան զորքի հրամանատար, բայց իրականում նա պետք է լինէր Արտա-

¹⁰ «Մովսիսի Խորենացույ Պատմութիւն Հայոց», Տիգրիս, 1913, էջ 193:

¹¹ Նույն տեղում:

¹² Նույն տեղում:

վազդ V-ի զորքերի սպարապետը: Սակայն հորենացին շփոթելով դեմքերն ու դեպքերը, ասում է, որ Տիրան-Տրդատը, սիրելով այս նրախնավունին «տալ նմա զղահն երկրորդական, զոր ունէր Արտաւազդ»¹³: Այս տեղեկության մեջ կարևոր է այն, որ Արտավազդ թաղավորը գրավել է երկրորդական գահը:

Խորենացու մոտ այս Արտավազդի մասին պահպանված հիշողությունների մեջ կարևոր է նաև այն, որ նրա գահակալության ժամանակ Հայաստանում գտնվել է պարսկական իշխանության ներկայացուցիչը: Ըստ Խորենացու, Հայոց թագավորը Երախնավու Անձեացու մոտ է թողնում «...զԴրուսպ ոմն պարսիկ զմտերիմ իւր, որ խնամեցեալ էր ընդ նախարարս Վասպուրականի...»¹⁴: Այս ժամանակաշրջանում «Վասպուրական» նշանակում էր արքայազունների երկիր, որպիսին հանդիսանում էին Արշակունի սեպուհների երկիր Աղիովիտ և Առքերանի գավառները: Հիշյալ Դրուսպ պարսիկը պետք է լիներ Մաղկոտն գավառի Շահապիվան ավանում կենտրոնացած պարսկական զորամասերի հրամանատար և «շահապ»¹⁵: Մաղկոտն գավառը Այրարատում տեղավորված «կայնական զօրքի» ամառանոցն էր և այնտեղ՝ Անգղավանում այս ժամանակ արդեն պիտի լինեին ատրուշան և մոզերի համայնքը: Կարևոր է նաև Խորենացու այն տեղեկությունը, որ թագավորը նրան էր տվել՝ «ղաւանն Տատեօնս հանդերձ ագարակօքն, և զայգին մեծ, յոր մտանէր Առուն գետ»¹⁶, հանեալ ի ծովէն Գալլատուայ»¹⁷:

Ուշագրավ է Խորենացու նաև այն հաղորդումը, որ «քանզի զաւակ ոչ գոյր Արտաւազդայ՝ արքայ թողու յԵրախնաւու զամենայն տունն Արտաւազդայ»¹⁸:

Պատմահոր այս տեղեկությունը կապ պիտի ունենա շղթայակապ Արտավազդի ավանդության հետ, որի մասին նա հաղորդում է «Պատմության» նախորդ գլխում և որի հետ նույնացնում է այս Արտավազդ թագավորին: Խորենացին գրում է, որ պառավները Արտավազդ թագավորի մասին զրուցում են, թե «արդելեալ կայ յայրի միում, կապեալ երկաթի շղթայիւք. և երկու շունք հանապազ կրծելով զշղթայսն՝ ջանայ ելանել և առնել վախճան աշխարհի. այլ ի ձայնէ կռանահարութեան դարբնաց զօրանան, ասեն, կապանքն: Վասն որոյ և առ մերով իսկ ժամանակաւ բազումք ի դարբնաց, զհետ երթալով առասպելին՝ յաւուր միաշաբաթոյ երիցս կամ չորիցս բախեն դսալն, դի զօրասցին, ասեն, շղթայքն Արտաւազդայ»¹⁹:

Ինչպես տեսնում ենք, տվյալ դեպքում ևս միատեսակ անուններ կրող անձնավորությունները դարձել են մեկ անձնավորություն: Այսպես է Արտաշեսի որդի Արտավազդը և մեզ հետաքրքրող Արտավազդը, թերևս խոսքով I-ի որդին: Արտավազդ V-ի մահվանից հետո նրա տոհմի գահակալությունը չի շարունակվել և իշխանությունն անցել է Սասանյան Որմիզդ-Արտաշիրին:

¹³ Նույն տեղում, էջ 194:

¹⁴ Նույն տեղում:

¹⁵ Ա գ ա թ ա ն գ ե ղ ո ս, էջ 460. «զշահապն Շահապիւանի»—873:

¹⁶ Գալլատու լճից բխող գետը, որը շարունակվում է Մակի մոտերքով Զանգիսար անվան տակ, թափվում է Արաքս գետը: Հնում այն կոչվել է «Առուն գետ», որ «գետառու» բառի ալլ ձևն է և ցույց է տալիս, որ մի ժամանակ, գոնե նրա վերին հոսանքում, այն իսկապես առու է եղել:

¹⁷ Մ. Խորենացի, էջ 194:

¹⁸ Նույն տեղում:

¹⁹ Նույն տեղում, էջ 192:

ուստի հորենացին վարող էր ասել, որ «զաւակ ոչ գոյր Արտավազդայ...»²⁰, բայց ասել, որ թագավորը դրա պատճառով Արտավազդի ամբողջ տունը թողնեց Երախնավու Անձեացուն, իրական չէ: Տվյալ դեպքում միայն մի հիմք կա: Դա շղթայակապ Արտավազդի առասպելն է, որ կապվում է Անձեացիք գավառի Ագաւաքար կամ Դարբնաց քար կոչվող Անահիտի մեհյանի հետ, որի տեղում միջին դարերում հիմնվեց Հոգվոց վանքը²¹: Այս վայրը կապվում է Միհրի պաշտամունքի հետ և մինչև վերջերս ժողովուրդը դիտեր, որ այնտեղ քարայրում փակված է Մհերը, որի սրբազան թռչունն էր աղաւթը²²: «Դարբնացքար» տեղանունն ինքնին վկայում է այս առասպելի մասին և պատահական չէ, որ մինչև վերջերս Հոգվոց վանքում էին ցույց տալիս Տրդատ թագավորի գերեզմանը²³: Տվյալ դեպքում պարզապես շփոթություն է առաջացել, որովհետև այս վայրը կարող է կապվել միայն շղթայակապ Արտավազդի գրույցի հետ: Տիրան-Տրդատ II-ը պիտի թաղվեր հայ Արշակունիների դամբարանում, որը գտնվում էր Դարանաղի գավառի «յամուր տեղին անուանեալ Անի, ի թաղաւորարնակ վայանսն հանգստոցաց գերեզմանաց թագաւորացն Հայոց»²⁴, իսկ Արտավազդ V-ը հասկանալի պատճառով չէր վարող այնտեղ թաղվել: Նա պիտի թաղվեր Անձեացիք գավառում՝ Ագաւաքար վայրում, և ուղատահական չպետք է համարել, որ շղթայակապ Արտավազդի գրույցը կապվում է այս տեղի հետ:

Մեծ Հայքի հռոմեական մասում ևս գոյություն ունեն որոշակի ստատուս: Հռոմեական Հայաստանը (կենտրոնը՝ Ջրմես ավան) կախյալ թագավորություն էր, որի թագավորը իր այրուծիով շարունակում էր մասնակցել կայսրության պատերազմներին, իբրև «զաշնակից և բարեկամ կայսեր և հռոմեական ժողովրդի»: Հռոմեական կայսրությանն անցած Մեծ Հայքի արևմտյան մասը բաղկացած էր Մոփաց աշխարհից և Բարձր Հայք նահանգից, որը կոչվում էր Armenia maior, այսինքն՝ «Մեծ Հայք» և միացած էր Փոքր Հայք— Armenia minor երկրի հետ: Իբրև «ձեռնական աշխարհ թագաւորին Հայոց» Հռոմեական Հայաստանի կազմի մեջ պիտի մտնեին նաև Միջագետքի Գիմաթենե գավառը՝ Վաղարշակուպոլիս կենտրոնով²⁵: Քանի որ հռոմեական Հայաստանը մտնում էր կայսրության վարչական փածանման համակարգի մեջ, ուստի Ագաթանգեղոսն այն համարում է «զաստակերտ կայսերաց»²⁶:

²⁰ Նույն տեղում, էջ 194:

²¹ Խորենացուն վերագրվող «Թուղթ [առ] Սահակ Արծրունի և Պատմութիւն սրբոյ Հռիփսիմեանց» (տե՛ս «Մովսէսի Խորենացոյ մատենագրութիւնք», Վենետիկ, 1865, էջ 234—296, 301):

²² Թագ. Ավդալի բ գյան, Միհրը Հայոց մեջ (տե՛ս նրա «Հայագիտական հետազոտություններ», Երևան, 1969, էջ 40—41, 48, 54, տե՛ս նաև Գ. Халатьянц, Армянский эпос в истории Армении Моисея Хоренского, М., 1896, стр. 314—324):

²³ Գարեգին Սրվանձտյան, Հնոց և նորոց, էջ 13:

²⁴ Ագաթանգեղոս, էջ 409:

²⁵ Վաղարշակուպոլիսը (Սուսաշտատ) կոչվում էր նաև Արաոնե և հայտնի էր իր չերմուկներով, ուստի հայերը միջին դարերում այն կոչում էին Ջերմուկ, որի թուրքական արտասանությունն է նրա այժմյան Ջերմիկ անունը: Այն գտնվում է Ամիդ-Դիարբեքիից արևմուտք (տե՛ս Jos. Markwart, Südarmenien und die Tigrisquellen, Wien, 1930, էջ 251, 253, տե՛ս նաև Ս. Տ. Նրեմյան, Պայմանական հողատիրության առաջացման հարցի շուրջը ֆեոդալականացող Հայաստանում, «Ձեռնական իշխանութիւնը» Հին Հայաստանում («Պատմա-բանասիրական հանդես», 1971, № 1, էջ 3—8):

²⁶ Ագաթանգեղոս, էջ 73:

Հռոմեական Հայաստանի վարչական բաժանումն այդ ժամանակաշրջանում արտացոլվել է Վերոնյան երկրացուցակի մեջ (Codex veronensis, II, 8), ըստ այդ ցուցակի, իբրև Հռոմեական կայսրության Պոնտական շրջանի երկրամաս հիշատակված է Փոքր Հայքը, որին ավելացվում է նաև Մեծ Հայքը. «Փոքր Հայք, այժմ նաև Մեծ Հայքը» (Armenia minor, nunc et maior addita)։ Երկրի վարչական այս բաժանման սկիզբը առաջ է եկել ոչ թե 298 թ., Մծբինի 40-ամյա դաշնադրի հետևանքով, ինչպես սովորաբար կարծում են, այլ այն հետևանք էր 244 թ. ժամենամամթաբեր հաշտության, որը փաստորեն ուժի մեջ ստավ միայն 252/3 թ.։

Ենթադրվում է, որ Վերոնյան երկրացուցակը Դիոկղետիանոս կայսեր (284—305) պրովինցիալ բաժանման ռեֆորմ է։ Այդ պետք է ճիշտ լինի, սակայն նշված երկրացուցակն արտացոլում է մինչև 298 թ. գոյություն ունեցող իրավիճակը։ Ըստ Վերոնյան երկրացուցակի, ամբողջ կայսրությունը բաժանված էր 12 դիոցեզների, որոնցից երկուսը՝ Oriens և Pontica-ն, ընկնում էին Փոքր Ասիայի հյուսիսային և հարավ-արևելյան մասում։ Pontica—Պոնտական դիոցեզը բաժանված էր 7 պրովինցիայի, որոնց թվում էր նաև Փոքր Հայքը, այժմ նաև Մեծ Հայքը ավելացած²⁷։ Հետագայում (448 թ. կամ, ըստ Մոմզենի, ոչ ուշ քան 386 թ.) Պոնտիկոս Սիլվիոսն իր երկրացանկի (Laterculus) մեջ կրկնում է Վերոնյան երկրացուցակը, հաշվի առնելով նաև այն փոփոխությունները, որ տեղի էին ունեցել 386 թ. մոտերքը²⁸, Մեծ Հայքի թագավորության երկրորդ բաժանման հետևանքով (384—387 թթ.)։ Ամբողջ թյուրիմացությունն առաջացել է նրանից, որ ուսումնասիրողները Armenia maior-ի տակ հասկացել են Մեծ Հայքի միասնական ամբողջ թագավորությունը, նրա ամբողջական տարածքը, մոռանալով որ Armenia maior նեղ իմաստով պիտի հասկացվեր «Աշխարհացոյցի» Բարձր Հայք նահանգի տարածքը։ Միայն այս փոքրիկ տարածքը Մովսես աշխարհի հետ կարող էր միացվել Փոքր Հայքին՝ իբրև հավելում։ Այդպես է եղել իրականում և՛ 244—252/3 թթ. և՛ 384—387 թթ. բաժանման ժամանակ, ուստի Հ. Մանանդյանը²⁹ ճիշտ չէ, երբ Վերոնյան երկրացուցակում նշված Armenia maior-ը համարում է 298 թ. վերականգնված Մեծ Հայքի ամբողջական տարածքը։ Սակայն ճիշտ է ն. Ադոնցը, երբ գրում է, որ Վերոնյան երկրացուցակի Armenia minor-ից հետո nunc et maior addita հավելումը ընդունվել է Սիլվիոսի կողմից, որով հետևապես համապատասխանում էր IV դ. վերջերին հաստատված այն նոր իրավիճակին, ըստ որի Հայաստանը բաժանվել է երկու մասի³⁰։ Հիշելով, ինչպես տեսանք, Դիոկղետիանոսի կայսրության ժամանակաշրջանում՝ 284—297 թթ. և նրանից առաջ՝ սկսած 252/3 թթ., Հայաստանի տարածքային բաժանումը նույնն էր, ինչ որ 384—387 թթ. հաջորդած ժամանակաշրջանում։ Ռազմական տեսակետից 252/3—297 թթ. Հռոմեական Հայաստանը շարունակում էր մնալ Կապադոկիայի ռազմական շրջանի համակարգում։

Արտավազդ V-ի թագավորությունը Հայաստանի պարսկական մասում հավիվ 9 տարի տևեց։ Հայ Արշակունիներին վերացնելու առիթ հանդիսացավ Արտավազդ V-ի դիրքորոշումը գերեվարված Վալերիանոս կայսեր հանդեպ։

²⁷ Н. Адонц, Армения в эпоху Юстиниана, СПб., 1908, стр. 85.

²⁸ Նույն տեղում, էջ 86.

²⁹ Հ. Մանանդյան, նշվ. աշխ., էջ 116.

³⁰ Н. Адонц, նշվ. աշխ., էջ 88.

Վալերիանոսի գերութիւնը 260 թ. և նրա բանակի ոչնչացումը Հին Աշխարհի համար արտասովոր երևույթ էր. այդպիսի խայտառակ և ստորացուցիչ պարտութիւն կայսրութիւնը չգիտեր: 361 թ. Շապուհ I-ի դեսպաններն իրենց և հարեան երկրների թագավորներին հանձնում էին նամակներ, որոնց միջոցով աշխարհով մեկ ազդարարում էին, որ խառանի և Եգիպտոսի ճակատամարտերում ջախջախվեց հռոմեական 70 հազարանոց բանակը, իսկ կայսր Վալերիանոսը, նրա եպարքոսներն ու արքունիները գերի վերցվեցին: Սիրիան, Կիլիկիան և Կապադովկիան ենթարկվեցին հրկիզման, ավերման ու նվաճման:

Այս հաղթական ուղերձին առանձին թագավորութիւնների տիրակալները տարբեր կերպ արձագանքեցին: Նրանց մի մասը պատասխանեց, իսկ մյուս մասը արհամարհող լռութեամբ դիմավորեց: Բարբախտաբար մեզ է հասել Հայոց թագավոր Արտավազդ V-ի պատասխան նամակը Շապուհին, որը պահպանել է հռոմեական պատմիչ Տրեբելիոս Պոլլիոնը: «Արտավազդ, Հայոց թագավորը, — ասում է Տրեբելիոսը, — ուղարկեց Շապուհին հետևյալ նամակը. — «Համակիր եմ քո փառքին, բայց երկյուղ եմ կրում, որ դու ոչ այնքան հաղթել ես, որքան հրահրել ես մոլեգին կռիվը: Վալերիանոսին այժմ պահանջում են ազատ արձակել և՛ նրա որդին, և՛ թոռը, և՛ հռոմեական զորավարները, և՛ ամբողջ Գալլիան, ամբողջ Աֆրիկան, ամբողջ Սպանիան, ամբողջ Իտալիան ու նաև բոլոր ժողովուրդները, որոնք ապրում են Իլլիրիկումում, նաև Արևելքում ու Պոնտոսում³¹ և որոնք կողմնակից են հռոմայեցիներին կամ նրանց հպատակ են: Դու վերցրիր գերի միայն մի ժերոնու, իսկ քո դեմ խիստ թշնամացրիր Երկրագնդի բոլոր ժողովուրդներին, գուցե նաև մեր դեմ, որ ուղարկել էինք քեզ օգնական զորքեր, մենք, որ քո հարեաններն ենք՝ միշտ ծանր դրութեան մեջ ենք ընկնում, երբ դուք իրար հետ կռվում եք³²: Այսպես էր պատասխանում Հայաստանի պարսկական մասի Հայոց թագավորը, որի երկիրն անմիջապես սահմանակից էր պարսկահռոմեական պատերազմների մարտադաշտերին, իսկ վրացիները, աղվանները և քուչաններն առհասարակ հրաժարվեցին Երանշահի արքայի նամակները ստանալ և նույնիսկ խոստացան օգնելու հռոմայեցիներին:

Այս նամակի բնագիրը, անկախ նրանից թե այն գոյութիւն է ունեցել, թե պատմագիրն է Արտավազդին վերագրում, բոլոր դեպքերում հանդիսանում է իր ժամանակաշրջանի հետաքրքիր վաստակագործ: Այս բնագրից տեղեկանում ենք, որ Մեծ Հայքի պարսկական մասը, որտեղ թագավորում էր Արտավազդ

³¹ Illiricum, Orleans, Pontica — սրանք հռոմեական կայսրության Բալկանյան թերակղզու և ասիական դիոցեզներն են:

³² Scriptores Historiae Augustae, vol. III. Trebelli Pollionis, Valeriani duo III, 1—3 (The Loeb Classical Library), London, 1954, էջ 4, 6:

III. Artavasdes rex Armeniorum talem ad Saporem epistolam misit: «In partem gloriae venio, sed vereor ne uon tam viceris quam bella severis. Valerianum et filius repetit et nepos et duces Romani et omnis Gallia et omnis Africa et omnis Hispania et omnis Italia et omnes gentes quae sunt in Illyrico atque in oriente et in Ponto, quae cum Romanis consentiunt aut Romanorum sunt, unum ergo senem cepisti sed omnes gentes orbis terrarum infestissimas tibi fecisti, fortassis et nobis, qui auxilia misimus, qui vicini sumus, qui semper vobis inter vos pugnantibus laboramus». Հայերեն թարգմ. Հակոբ Մանանդյան, նշվ. աշխ., էջ 93—94:

V-ը, ներքին կյանքում անկախ էր և կախվածությունը Սասանյան Իրանից արտահայտվում էր նրանով, որ պատերազմի ժամանակ Հայոց թագավորը օժանդակելու էր օգնական զորքերով: Ուշագրավ է, որ ժամանակակիցները յիտակցում էին, թե բուֆեր պետության վիճակում գտնվող Հայաստանին որքան ծանր է նստում յուրաքանչյուր պատերազմական ընդհարում Սասանյան Իրանի և Հռոմեական կայսրության միջև: Ի վերջո՝ մեջբերված նամակի տեքստը ցույց է տալիս, որ նույնիսկ, եթե սկզբնական շրջանում Արտավազդ V-ը համակրել է Սասանյաններին, այս շրջանում նա չի թաքցրել համակրանքը հռոմեական կայսրի հանդեպ և միայն հարկադրաբար է պաշտպանել պարսիկների շահերը: Սա այն ժամանակն էր, երբ Սասանյան Իրանը գտնվում էր հզորության գագաթնակետին և Հայաստանում Արշակունիների հանդեպ նախկին հանդուրժողական քաղաքականությունը փոխվում է: Արտավազդ V-ը իր վերոհիշյալ նամակից հետո համարվում է անվստահելի անձնավորություն: Նրան գահընկեց են անում և, ըստ երևույթին, սպանում, իսկ Հայաստանի պարսկական մասը դարձնում են Սասանյանների «դաստակերտ» (ժառանգական սեփականություն): Հայկական գահը հայտարարվում է Սասանյան դինաստիայի «երկրորդական գահ» և տրվում է Շապուհ I-ի որդուն՝ գահաժառանգ և պարսկական զորքերի գերագույն հրամանատար Որմիզդ-Արտաշիրին:

262 թ. փորագրված Նախշ-ի Ռուստեմի «Քաաբա-ի Զարդուշտ» Շապուհ I-ի եռալեզու արձանագրության (ՏՔՀ) մեջ Որմիզդ-Արտաշիրը հիշատակվում է իբրև «Արմենիայի մեծ թագավոր»: Այսպես է վերջանում հայ Արշակունիների գահակալությունը Հայաստանի պարսկական մասում, իսկ հռոմեական մասում շարունակում էր թագավորել Տիրան-Տրդատը (Տրդատ II), մինչև 273 թ., երբ նրան հաջորդում է որդին՝ Խոսրով II-ը (273—287), Տրդատ III Մեծի հայրը: Վերջինս 293 թ. ղեկի ուժով վերականգնում է Մեծ Հայքի թագավորության ամբողջականությունը:

ПОЛИТИЧЕСКОЕ СОСТОЯНИЕ АРМЕНИИ В ПЕРИОД ЦАРСТВОВАНИЯ АРТАВАЗДА V (252/3—261)

С. Т. ЕРЕМЯН

Академик АН Арм. ССР

Резюме

Результатом «постыднейшего мира» 244 г. между Сасанидским Ираном и Римской империей был раздел царства Великой Армении на персидскую (4/5 часть) и римскую (1/5 часть) части. Армянский царь Тиридат II (216—252/3) восстал и не признал навязанные стране условия мирного договора 244 г. Этим воспользовались римляне, надеясь на военные успехи имперских войск. Из трехязычной надписи персидского царя Шапура I (243—272) на «Кааба-и Зардушт» в Накш-и Рустеме узнаем, что из-за Армении возобновились военные действия между двумя державами. Во время военной кампании, которую возглавлял сын Шапура I, наследник престола и главнокомандующий иранскими войсками Ормизд-Арташир, римляне в Сирии, Каппадокии и Месопотамии потерпели тяжелое поражение, и император Галл (251—253) в

252/3 г. вынужден был признать условия договора 244 г. После этого восставший армянский царь Тиридат II со своим двором перешел в римскую часть Армении, где процарствовал еще 20 лет (с 252/3—273 гг.). В персидской части Армении остались недовольные проримской политикой Тиридата II аршакидские сепухи, из которых Артавазд V (с 252/3—261) был назначен Шапуром I царем этой части Армении. Были восстановлены условия Рандейского соглашения 63 г. н. э., в силу которого армянский престол являлся вторым (*secundogenitur*) после престола царя царей, но уже не парфянских Аршакидов, а Сасанидов. Эта часть Армении сделалась вассально-зависимым царством. Однако такое положение местной династии в Армении Сасаниды терпели до поры до времени.

Новыми военными успехами Сасанидов во время третьей кампании против римлян, когда был взят в плен император Валериан (в 260 г.), была предreshена судьба армянских Аршакидов в персидской части Армении. Артавазд V был лишен престола и, вероятно, убит. Поводом для этого послужило его письмо Шапуру I, в котором он не скрывал своих симпатий к римлянам и просил освободить из плена императора Валериана (текст письма сохранился у Требеллия Поллиона). В упомянутой трехязычной надписи «Кааба-и Зардушт», высеченной в 262 г., «великим царем Армении» фигурирует уже сын Шапура I, наследник престола Ормизд-Арташир. Персидская часть Армении была объявлена «дастакертом» (наследственной собственностью династии Сасанидов) и вторым престолом после престола «шаханшаха Ирана и не-Ирана». Этим подчеркивалось важное значение Армении как военного плацдарма в борьбе Сасанидского Ирана против Римской империи на месопотамской границе.

В римской части Армении продолжал царствовать Тиридат II, Агафангел называет эту часть «дастакертом римлян», она являлась вассально-зависимым царством, находящимся под «покровительством» римского императора. В 293 г. с помощью римлян армянские Аршакиды изгнали Сасанидов из восточной части страны и восстановили политическое и территориальное единство царства Великой Армении.